

DESCRIPTION DE VVESTERVVYCK, AVX ENVIRONS DE LA DAMOISELLE DE SVEDE, ET LE

commencement des roches d'ictes *Schares* de *Suede*.

PRemierement il y a de Kalmer iusques à la Damoiselle de Suede vers N. quart au N. E. & nord norest 8. lieues, & Silbuy est le premier haure au dedens des Schares susdictes, de la se peut nauiger vers Westervvick, Fluerbuy & Schelschuer, parmi lesdicts rochers, & il y fait bon par tout. Depuis la Damoiselle de Suede iusques au trou & entrée de Stockholme, il faut nauiger nord norest dixhuit lieues, & le terroir de Stockholme, s'estend E. norest. Et le susdict trou s'estend au dedens premierement norest quart au nord, & en apres nord norest iusques a Duerhauen, & il faut laisser la roche dicte le Wig-steen au costé gauche du nauire, & la roche dicte de Middelseen à main droite, & la roche dicte Roo Koe, c'est à dire, rouge Vache, gist deux lieues au dedens du trou, & de Duerhauen s'estend ledict trou de Stockholme la pluspart N. O. & N. O. quart à l' O. & N. O. quart au N. iusques à Wicxholm. Audedens des Schares ou roches de Westervvick est le fond par tout bon pour se tenir à l'ancre sur 16. & 20. toises.


Les haures susdictes, resortans sous la iurisdiction du Roy de Suede, ont depuis peu de temps en ça bien prosperé, tellement qu'à present il s'y fait grande traficque de toutes sortes de denrées, comme de Poix, Orge, Griote, Pelteries, denrées grasses, Noisettes. & grande quantité de Fer & Cuyure.

Oelant n'a point de haure, mais on peut ancrer sous Oelant dedans Calmerfont, estant le lieu le plus propre pour charger car il y fait par tout bon ancrer.

Le bout Septentrional de Oelant est esloigné de 7. ou 8. lieues de la pointe de Gotlande vers le E. S. E. & O. N. O.

Les Isles ou Rochers de Cærelso, sont vers le costé Occidental de Gotlande guerres loing de terre, mais à l'entour du Petit Cærel fait il par tout beau, on peut ancrer tout à l'entour ou on veut.

On peut ancrer sous le Grand Cærel au costé d'E. & O. le costé de S. & N. est mauuaise, il y a 12. toises de profondeur.



Au Norest de Cærel est la ville de Wisbuy, laquelle souloit estre fort estimée, elle est esloignée 5. lieues de Cærelso au N. E. & S. O.

Wisbuy est dans la renommée Isle de Gotlande (resortant sous le Roy de Danemarck) esloignée environ de 10. ou 12. lieues de terre ferme, sa longueur est de 18. lieues, & sa largeur de cinq. Le peuple y est adonné à labourer la terre, produit encores quelque peu de poix dur, & du fluide, mais pas tant qu'il souloit, car le bois est presque tout coupé. Il y a 18. villages, avec tours pointues, elle a retenu son nom des Gots qui y ont autresfois tenu leur residence.

Les vieilles loix & coustumes de la Mer ont premierement prins leur origine d'icy, dont tous les escriuains de Cartes de nostre temps ont prins leur fondement quoy qu'ils ne le veulent presque point confesser.

De la pointe Meridionale de Gotlande descend vn petit banc lequel est fort pierreux, & au bout meridional de Gotlande y a vne haute tour pointue, nommée Huborch ou Hoeburch. De la pointe de Gotlande iusques à Heylich holm il y a 4. lieues, le cours N. E. c'est vn bon haure, mais incognu. Bosvick est vn peu mieux cognu, & est à vne lieue vers le N. Il y a vne Isle, au milieu du trou, il fait meilleur d'y entrer par le S. On peut aussi entrer vers le N. & laisser les deux Rochers à Estribort, c'est vn beau haure & y a 3. toises d'eau, vne lieue vers l'Est de Bosvick est situé Narvick, & au costé occidental du haure y a vne longue roche, la faudra il passer tout aupres, & laisser les autres roches pointues à Basbord & ietter l'ancre dans le haure sur 4. ou 5. toises, vers l'Est de Narvick environ 2. lieues vers le N. E. est le haure de Santvick & s'estend N. N. O. il est profond de 5. ou 6. toises, il y a vne Capelle sur la pointe de la terre.

De Santvick iusques à Oostergarde il y a vne grande lieue & la route est N. E. quart au N. le Oostergarde est profond de 7. toises, on peut aller tout à l'entour de l'Isle, & rader sur 6. ou 7. toises, le trou d'Ooster s'estend vers la mer E. N. E. & de la iusques au haure de Slet, il y a 3. grandes lieues le cours estant N. quart à l'Est, de la iusques à Farosont il y a deux lieues le cours estant N. quart à l'Est.

Du bout Septentrional de Farosont descend vn banc, & s'estend vne grande lieue en Mer N. N. E. se nomme Salve-onreyn. Trois lieues N. quart à l'Est de Farosont est Gorgesande, on y peut nauiger à l'entour, à vne lieue de grandeur, & tout à l'entour est le riuage blanc, il ne s'y tient personne, du bout N. O. descend vn petit banc, il y a la 7. 6. & 8. toises de profondeur & par tout bon fond pour ancrer.

Le Copersteen est esloigné de Godtgefanden vers le O. N. O. & N. O. quart à l'O. de 2. grandes lieues.